

校

禮

堂

詩

集

校禮堂詩集卷三

歙凌廷堪次仲撰

庚子

送方竹樓之潤州

泥滑冰融水亂流
離人又放渡江舟
此行飽聽西津雨
乘興還登北固樓
疎柳有情迎客眼
落梅無數打船頭
揮豪倘欲尋藍本
一上高山望五州

看桃花

步履桃花裏
桃花無路通
回看舊來徑
一片桃花紅
日煖草漸長
雨餘泥乍融
春光添幾許
畫閣倚東風

校禮堂詩集卷三

挽趙雪蓬

白頭蓬戶抱遺編藥肆藏名七十年千首文章留海內
一生韋布老江邊置芻客有南州士負郭貧無下潁田
誰續真州耆舊錄好將軼事爲君傳

送鄔超然

撫劍不適意樓前驕馬嘶臨風一揮手獨去薊門西淺
水魚難得長松鶴始棲期君在何許隔歲蚤鶯啼

寄酌亭

胸山城下柳離別昔年心揚子江頭月相思此夜深近
懷宣尺素遠道托瑤琴南國秋風蚤胡爲久滯淫

留別許嵩陽表兄

世路崎嶇歷苦辛當筵數語見情親生涯笑我餘孤劍
知己如君復幾人千里松楸燈下淚廿年萍梗客中身
從今得遂還鄉願感激臨岐倍愴神

阻風青山

晨起風打頭向晚勢轉大遙觀青山顛浩浩飛壩堞波
濤聲喧呌船頭肆掀簸客子俯首歎長年袖手坐抑鬱
掩篷窗去住兩無那日閱東下舟何止千帆過吾楫豈
不良時乎偶相左終當乘長風萬里巨浪破此意誰共
論孤吟仍自和

黃天蕩

舟行阻石尤三日未得放宵來旗角轉乃至黃天蕩混
茫連長空天地入俯仰星漢出其裏元氣曩萬象當年
韓蘄王血戰氣慨慷兵少力不支火箭著五綱哀哀古
戰場國殤颯精爽至今波濤間百怪窮象罔是時夜無
月天水互明朗鬼雄騎大魚荷戈激流上青燐持作燈
從之夔罔兩聚散迭隱見叫嘯歛來往篙師手指口魄
慄不敢響予時方對酒憶古結遐想推窗一酌之高歌
扣烏榜

舟中望攝山

一峰撐碧峭峻嶒傑閣飛樓占上層地冷未消三日雪
雲深疑有六朝僧孤舟此際虛游屐仄徑何人拄瘦藤
回首山靈仍自笑題詩聊復記吾曾

登雨花臺

建康城畔雨花臺形勢居然四望開獨客偶憑高檻立
羣山爭擁大江來香銷北里羞名士人去南朝想霸才
撫劍長歌重回首怒濤空卷雪成堆

采石

采石長江水滔滔萬古新當年江上月曾照謫仙人巖
谷猶如昔風流不可親惟餘一抔土常與謝家鄰

泊蕪湖

城郭標形勢孤懸澤國邊暮雲吳苑樹寒雨楚江船寂
莫漁垂釣喧呼吏索錢上游興廢係細數六朝年

張睢陽廟

在灣址鎮

華清舞妖狐昭陵趨石馬哀哀老哥舒痛哭潼關下雨
都已不守唐室若崩瓦偉哉真源君奮臂捍中夏至今
江淮間歆祀徧郊野我行過宣州崇祀煥丹楮入門瞻
須眉英風起尊竿傍配許太守比肩坐高厦睢陽泊偃
師兩地碧血灑事後互謗傷疑案惑輦啞子弟尚不信
况乃悠悠者悲來薦溪毛再拜淚盈把

桓公嶺 在涇縣

夕陽下西麓當路兩山夾初登猶寬廣漸上轉窄狹行四五里僕夫坐仰脅捫厯涉其顛我足亦困乏當年峻約徒流兵此剽刼桓桓內史秣馬厲戈甲遺恨斷要領碧血殷載斃千載芳躅在猶足起懦怯崩厓帶餘勁怒欲向人壓夜深人蹟稀但與猿鳥狎素蟾騰林表塵鏡乍開匣來朝指前途羣岫碧空插

桓公祠

宜城內史此勤王遺廟真流百世芳一死能從君父難九原應恨子孫狂居人伏臘仍香火牧豎郊原話戰場

輸與東山謝安石階前玉樹悉成行

箬嶺

一嶺界宣歙突兀浮雲齊履底千萬峰不敢爭高低細
路如秋蛇盤迴接飛梯壁立緣青空蒼蒼烟霧迷嚴冬
十二月客子行攀躋夕陽墮前山妖鳥窺人啼巖罅生
腥風夜有猛虎棲異景豎毛髮顧視色慘悽積雪山之
陽半化爲冰澌懸厓已難援况復多水泥奮臂攀藤蘿
側足踐蒿藜跬步偶失度下乃百丈谿陟險理則爾顛
覆寧排擠傳聞汪越國鑿此通征轡未審仄徑中何以
容輪蹄野語半雷同事往莫可稽題詩紀游歷排冝驚

昌黎

初至家有感

伯仲歸來千里餘
眼中風物轉蕭疎
故園耆舊成荒壠
喬木先人有敝廬
白髮尚堪娛老母
青箱何處問遺書
擬將築室荒田側
十畝春煙日荷鋤

里中雜詩十首

并序

余兄弟生於胸海歸里時耆舊凋謝往事多就湮沒
搜訪閱月凡家乘所載宗族所傳及摩挲碑碣而得
者悉著於篇聊備遺忘非敢以爲詩也

海上勞生廿四年
今朝始到故山邊
村荒邑乘難詳載

校禮堂詩集卷三

遺事聊從古老傳

憶從顯慶判山城梓里棠陰最愴情父老尚能歌舊德

可憐谿水至今清

始祖別駕公諱安唐顯慶初自餘杭來判歙有政績載在郡志卒遂家焉

數椽舊是弭歌地寥落松篁冷夕陽剩有三橋居士筆

燕泥零落輔仁堂

五世祖刺史公季父善人公建文會於村南爲子弟族人讀書之所堂名

輔仁爲文壽承書左曰不窺園右曰來青軒其後築臺悉種梅花有松數株大可合抱

小閣猶存曲沼平當年雙鳳舊知名祇餘故額空塵土

誰識吳門百穀生

刺史公及太常公明萬歷壬午戊子相繼登賢書公車北上吳人王百穀

書雙鳳館三字以贈歸構別墅讀書其中今故額猶懸於門而宅已爲族人所有

比部分符守夜郎力摭水蘭捍危疆烽煙甫靖身旋死

萬里忠魂泣點蒼

太常公諱子儉刺史公仲弟明萬厯戊子舉人天啓初由刑部郎出守曲

靖道經貴陽值水西安氏之變遂留守禦城全身殞贈太常寺少卿

怡怡誦讀共幽棲小構傳聞俯瞰溪莫問臨清棲舊址

雞豚成隊菜成畦

臨清棲先高祖東里先生兄弟讀書處也故址尚存今廢爲種菜地

英風毅魄滿乾坤異代聲名萬古存不特六忠祠畔路

歲時伏臘走諸孫

六忠祠在溪側中祀宋待制公唐佐明太常公子儉尚書公義渠侍郎公

駟御史公潤生刑部公世韶內侍制公休寧人尚書公烏程人

梅山春草接蓮塘處處松楸半已荒不是含辛歸負土

誰捫殘碣到平岡

五世祖墓在蓮塘高祖曾祖墓皆在梅山太常公墓因無後已迷其處再

四尋訪始得之於近村荒烟蔓草中殘碣猶存

七寶莊嚴九品蓮小龕踈磬兩悠然客來夜半塵緣寂

溪水無聲月在天

水月境在輔仁堂側中供觀音像

雙溪左右抱村斜村帶垂楊五百家待得春深齊拂水

綸竿簑笠送生涯

雙溪垂楊最佳長條晚地閭邑所無

來青軒夜坐

向夕掩關坐寂寥無客來中庭明月上照見梅花開

辛丑

深渡

客子溪頭晚放船緩搖雙槳下長川一灣流水清見底
兩岸亂峰高刺天餉婦攜筐迴舊袖村翁賽社斂青錢

香醪莫惜頻沽滿今夜蓬窓趁醉眠

米灘

新安水錯出百里始同派其下有巨灘重險天所界大
石截流立衆水共爭隘老龍伏波底掉尾弄光怪爪鬣
騰之而歛薄激滂湃舟行偶不慎觸之立摧敗榜人面
如土力盡不敢懈貫索百丈牽攢篙十夫僊船底薄於
紙性命寄纖芥同行三數人顛悸起再拜我獨驚未聞
酌酒賞奇快人生宇宙間太倉一稊稗忠信吾固有波
濤豈足戒旣醉險亦過慨焉發長喟舉杯示彼曹茲游
庶豪邁

淳安

舟過淳安境春流沒漲痕亂山森似戟僻縣小於村錦
石游蹤杳青溪戰壘存欲尊皇甫蹟新月又黃昏

謝臯羽墓

南渡山河作戰塵獨攜如意向江濱登臺自哭文丞相
抔土誰憐宋逸民斷蘚久封碑字古野花時傍墓門春
惟餘晞髮新詩句留與行人一愴神

過富陽

江波浩蕩白鷗閒夾岸晴峰擁髻鬟十載摩挲圖畫裏
於今親見富春山

錢塘江

潮水過富陽其勢乃漸寬羣山四散開現出白玉盤春
雪將次消百頃波漫漫五日山中舟竿确經危灘今始
豁眼界浩漾縱大觀微風起天末淡沲生晴瀾雁鴻或
上下鳬鷖時往還枉渚望不窮遙峰秀可餐信哉山水
區瀟灑非人寰安得買簑笠於此垂綸竿黃帽笑語我
此是春時看恐君或未知七月八月間儻來觀秋濤崔
嵬如銀山

辛丑正月二十四日過杭州易舟將發倉卒中偕

猶子

嘉錫

放棹西湖僅半日許歸途依依猶覺

清暉之戀人也

廿載天涯結夢思今朝真見放船時春生南國應無價
人到西湖定有詩細雨已催冰做水好風將放柳成絲
何當重作探奇客預向青山訂後期

過平望

濺濺流水淨無沙兩岸疎籬整復斜微雨暮寒將變雪
野梅春淺未成花輕帆郢客欹烏帽小舫吳孃隔絳紗
滿目風光任吟賞劇游豪興一何賒

吳江道中

風流當日順陽公會解吹簫贈小紅寄語東風休作雪

扁舟今夜過垂虹

虎邱雲巖寺

吳門登覽興初濃
禪榻逍遙訪舊蹤
高阜尚傳金化虎
曲池無復劍爲龍
一簾碧影沿芳草
滿徑蒼陰蔭古松
行到上方幽寂處
塔鈴遙答暮天鐘

滄浪亭

吳越江山興未闌
滄浪亭下又盤桓
高才自不能諧俗
飲酒何曾解罷官
澹澹花陰春弄影
蕭蕭竹色晚生寒
寂寥詩客今何在
俯首斜陽一倚欄

無錫道中

雙槩搖開兩岸冰
斷雲明處塔層層
幾程碧樹辭吳會
一路青山到晉陵
門巷臨流繕蠶室
人家隔岸曬魚簪
惠峯泉水清如許
欲著芒鞋苦未能

魯子敬墓下作

在丹陽

蒼涼蹲石獸
左右蔭松樹
戢戢三尺土
傳是魯公墓
當塗昔逐鹿
豚犬望風附
百萬江陵師
天塹欲飛渡
吳兒仰面啼
膽裂敢相忤
時公方少年
按劍勃然怒
一呼公瑾來
定策非細故
赤壁奮蹴踏
鬼域走無路
熊羆江之東
王氣自此固
借劉以樹黨
能令老瞞懼
九鼎未遽窺
稍稍延漢祚
何人詆粗疎
猥哉張子布
我來馬鬣下
憑

眇生企慕狐狸不敢穴疑有精靈護呂城亦在茲過者
不一顧

渡江望金山

大江赴溟渤其勢莫敢對金山一片石故作倔強態屹
立當洪濤昂然不少退亘古流不去下有巨鼇戴古刹
何崢嶸峰巒隱其內雕甍接飛檐金碧炫螺黛

翠華此經過山靈被優賚

宸章煥標題光芒照萬代中流肅瞻視卿雲現黶黷廣
廈千萬間緇流數百輩浮屠高七級上與太空礙傳聞
登極頂江天得勝槩何當持綠玉高控黃鶴背

校禮堂詩集卷三

校禮堂詩集卷四

歙凌廷堪次仲撰

壬寅

錢唐廉吏行爲山陰童丈二樹作

錢唐廉吏高景蕃歿後九棺不得葬見夢於童童畫
梅十幀售以葬焉

白楊何蕭蕭北風聲正悲北望北邙山邱墳鬱纍纍十
歲讀詩書二十舉賢才三十作縣令吏民不敢欺四十
作刑官五十作監司不得上官喜獨結

天子知六十晉鴻臚七十奄忽歸同里老吉士隧石作

銘辭九棺不得葬廉吏不可爲賢者讀銘辭太息相徘徊
愚者讀銘辭淚下如縷縻山陰童布衣夜輒夢見之
冠纓紅木難黼黻垂裳衣正氣軒須眉堂堂方兩頤龍
須十幅紙幅幅生光輝慘沮前致辭乞畫十幅梅周南
有山長晨起往告之山長聞此語沉吟若有思鄉有賢
大夫二十舉賢才三十作縣令吏民不敢欺四十作刑
官五十作監司六十晉鴻臚七十奄忽歸九棺不得葬
請視吉士辭布衣坐小閣大筆何淋漓筆筆大秦珠幅
幅珊瑚枝洛陽貧太守拙宦被議歸囊出清俸錢買此
十幅梅畫軸卷贈我持此作葬貲山長謝布衣太守助

布衣洛陽十萬戶交口頌布衣山長持錢歸買地南山
陲上樹松與栢下逐狐與狸九棺一時葬行人相歎咨
作詩告行人不用相歎咨南山有時爛高誼永不移

中秋泊美人灣

蕭蕭天際雨初收浩浩河干水急流日暮碧雲風卷盡
美人灣畔度中秋

自高郵至寶應

兩城懸澤國錯壤贊湖邊民以堤爲命帆隨水到天人
家三版屋生計一池蓮不見孫莘老推篷意惘然

淮以南數百里無片石累日舟中意殊不樂戲作

夢遊蜀道歌以自廣

蠶叢有國名華陽千山萬山森劍鋸披圖覽記足未到
側身西望心傍徨竭來淮南地寬廣部婁纔高三四丈
蕭疎滿眼不稱意雲棧飛梯勞夢想鳥道一綫天邊懸
有蝶導我登其巔跑風巴馬疾於鳥下視雍梁兩點烟
劍門劍光半天燭對插奇峯萬靈伏歐冶聚得六州鐵
鑄作純鈎鎮庸蜀我來拔出雙蛟龍上下刺擊驚猿公
瑣瑣恩讐那足報會須持此臨崆峒迴看萬里岷江瀉
翠羽明珠衆靈迂邀我乘雲游太清手把芙蓉傾玉鉞
學仙學劍俱無成枕上忽被秋笳驚覺來啓戶看蒼翠

莽莽長淮如掌平

讀元遺山集

神京喋血竟生還
忍死重過石嶺關
一寸秋豪成野史
百年老淚灑空山
身經北渡流離際
才與東坡伯仲間
文獻中州盡凋喪
賴君大手紀完顏

渡黃河作

九河湮故道
河勢日南趨
豈曰難疏鑿
多緣賴轉輸
下游平易潰
上策古來無
佇見安瀾處
蒼生仰

聖謨

宿王家營

行李初登第一程荒村燈火客心驚長河東注雄無敵
秋色西來夜有聲千里荒塗憑馬迹三更茅店感雞鳴
不堪匣劍牀頭嘯襖被霜寒夢未成

發衆興棄驢坐牛車上

隄邊柳榦雙極立道上車蹤一尺深乍喜山川開眼界
不堪塵土浣衣襟蹇驢無分添詩思健犢猶能起壯心
珠勒雕鞍成底事幾時走馬杏花林

順河集

莽莽平沙合荒村策蹇過農功資赤墮禹力在黃河官
道多栽柳人家半隱蘿秋原衆年少猶唱大風歌

五花橋圯於水行者咸以舟渡舟人言水自駱馬
湖來由沐陽下海州也聞之悵然

我本黃海民寄身滄海旁滄海非故土而我生是鄉里
開舊兒嬉厯厯疇能忘所以浮屠氏不肯三宿桑況復
小人母白髮垂高堂四載事遠游道路徒奔忙今年又
驅車北走燕趙疆道經五花橋橋下水湯湯舟人云此
水東流下胸陽水中有鯉魚修鱗尺半長不寄一封書
使我心茫茫

晚抵紅花埠

斜陽滿地柳毵毵袴褶弓刀味漸諳一路青山爭送客

銷魂已不是江南

傾蓋亭

路出問官里空亭傍古城碑從何代建蓋向此間傾有
客徘徊久無言感慨生如新頭白者應愧昔人情

夜至李家莊

片月浮雲裏微茫路不真餓鴟聲似鬼怪樹影如人氣
以豪游壯詩因險鏡新行行沂水近明發問前津

渡沂河

石瀨舟難泊黃郎負客登中流沙漸露兩岸土全崩波
緩雀爭浴水清魚可罾傳聞春漲發萬馬勢奔騰

過大峪厓

當路懸厓立稜稜百丈高
仄愁車軸折險仗馬蹄牢
蘿薜牽衫袖塵沙損佩刀
俯身矜脫轡捷下亦云豪

青駝鎮道中同張秋堂飲村店

苦竹搶籬茅蓋屋
葦麻葉大棗初熟
山中一雨秋更濃
無數嵐光侵馬足
小店青帘絕點塵
舉杯同醉甕頭春
鴉糞十五當壚女
半掩蓬門學避人

蒙陰縣

蹀躞荒城下西風灑面塵
路遙行子倦縣小長官貧
秋影馬頭樹夕陽牛背人
東蒙山色好天際黛痕新

高堂生墓

七雄旣龍門禮壞不可收況經秦火後無復繼豪留堂
堂高堂生斯文守姬周淹中十七篇保護同琳瑯逸禮
三十九已共煙雲浮先王制作心賴此懸千秋柰何後
之儒排擊來相讐置之不立學宋人乃其尤六籍缺其
二誰復加研求割記以配經茲論亦謬悠我過新甫山
高墳峙松楸再拜不能起涕淚涔涔流議禮如聚訟折
衷知無由回首驪山下金棺狐兔遊

新泰重陽

梁父山頭日影微西風和冷上絺衣土惟白壤民知力

鞠有黃花客憶歸沙路漸諳驢背穩江臯空羨蟹螯肥
眼前賸得題糕興輸與南雲自在飛

羊流店弔羊太傅

阿童銜刀遊渡江今年青蓋入洛陽天開石馬一寰宇
誰致此者太傅羊安精旣滅當塗篡緩帶輕裘鎮襄漢
不辭良藥活敵人笑挈吳兒掌中玩當時全晉恢雄圖
何難百戰平勾吳豈知智士用心異要令恩澤淪肌膚
平將赤心置人腹死後三年定南服請看峴首峙豐碑
晉人墮淚吳人哭道傍蒼鵝飛上天長安宮闕成灰煙
南浮五馬民不叛王氣猶餘二百年萬騎臨江不敢過

始信從前慮遠大小兒拔齒快一時以力服人計誠左
君不見六十萬衆荆楚開麋鹿夜走章華臺五嶺甫營
三戶渡阿房徒取後人哀

望泰山

天際真形出巖巖氣脈長三公尊上秩萬古鎮東方遠
道艱梁父雄才憶漢皇詰朝攀日觀濯足瞰扶桑

岱廟

臺殿巍巍入杳冥頭門雲氣護金局冠裳自昔朝羣后
雷雨中宵謁萬靈巨石浪傳秦代跡豐碑猶勒漢時銘
碧霞深處頻回首齊魯迢迢未了青

望徂徠山

鬱鬱徂徠山拔地摩蒼穹翠色永不凋上有千年松屹
立泰岱傍勢欲吞羣峰儼然小國君不肯作附庸昔者
四七際琅邪起樊崇赤伏龍門野此地成盜叢何年倂
強姿化爲文章雄曾傳竹溪邊太白留遺踪又聞石守
道慶厯推鉅公我來望巖谷往事皆成空賢愚兩不知
但見青濛濛何時駕雲車絕頂鞭長虹喚起山頭月照
我太古胸

党竹溪故里

奉符山色青嵯峨汶水環抱山之阿竹溪仙去故里在

山川憑眺悲如何百年人物中朝望落落雄才氣奔放
高文不獨冠金源小篆猶能逼秦相武元射蛟江水中
爾時文治猶未隆采石江頭孽龍死中都王氣方熊熊
興陵受命開鴻運卅載人稱小堯舜唯公珥筆侍彤庭
鋪張功德陳謨訓同朝更有王黃華爭杼藻思紛天葩
雅雅魚魚壓揚馬秋山春水隨鑾車治亂興亡翻覆手
可憐紅衲中原走蔡州城下哭遺黎止有文章名不朽
一時南北兩奇人坎止流行各有因應笑江東辛棄疾
空將辭賦作陪臣

發肥城口占二首

城頭初日影遲遲縣宰棠陰盡有碑獨愛躋寧胡與魯

至元癸未勸農詩

元濟寧路與魯總管胡少中有至元癸未勸農四首勸縣署壁上

空山浙滙泉爭落廢蝶荒涼草亂生拂拭吟鞭仍自笑
驅將瘦馬過肥城

宿長清白雲閣

恐人白日狐狸嘯到寺黃昏蝙蝠飛滿地月明僧不見
老松橫影入禪扉

嚴相公廢祠

在長清祀元將嚴實

幹難河上五雲新開國功名屬武臣草昧能收文學士
英雄自識帝王真蕭條故壘成千古憑弔空祠定幾人

欲訪遺山舊碑碣不堪殘址徧荆榛

齊河懷古

赤符天子重高勲回首南宮日暮雲不信祝阿秋草外
至今人道耿將軍

鏡龍八載帝中原曾築孤城濟水邊鱗角未全成底事
殘碑猶紀阜昌年

德州道中

驅馬來屯事臨風一慨然山川空此日戰伐已當年大
路西通趙長河北走燕地衝徭役苦端賴長官賢

平原行

妖星夜照輶輶山漁陽鼙鼓驚天關平原太守奮戈起
捷書如羽飛長安天子茫然愕相向不識真卿作何狀
二十四郡豎降旛一臂能將河北障少年幕下真英雄
指揮河朔如旋蓬一門忠義照青史斷舌更有常山公
由來翰墨因人重凜凜千年毛髮動援筆曾爲乞米書
摩崖更勒中興頌隔津河畔秋草黃過者涕淚雙滂滂
八十老死天不許要令氣節光皇唐叛臣希烈何足數
可惜千鈞發鼷鼠當時誰人爲此謀盧奕生兒非幹蠱
嗚呼昌黎片語成德驚廷湊北面尊朝廷人生有幸有
不幸駐馬爲作平原行

董仲舒祠

獨抱公羊學千秋仰大儒漢廷三策最越國一仁無繁
露墜延際玉杯空座隅如何丞相貴但用牧豬奴

河間獻王墓

一炬斯文盡遺經出漢初賴茲朱邱力得保素王書梁
苑才安在淮南術已疎卽今三尺土持較復何如

鈎弋夫人歌

趙家有女好顏色時來嫁與秋風客一尺桐偶死泉鳩
小車夜召田千秋雙手如鈎待君理養得佳兒作天子
宮中空號堯母門年年風雨啼冤魂世人但知君太忍

那識英雄清禍本不見後來拓拔家聯臂空歌楊白花

路見菊花

風塵子里賦遄征一見黃花眼倍明記得去年風雨際
故人同醉廣陵城

河間城北三十五里有地曰毛精壘相傳爲漢毛
公塋處胡稚威撰河間縣志謂金末賊毛積元
末賊毛貴皆嘗掠河間壘以毛名非積卽貴非
毛公冢也

祖龍一火六籍殘厥初傳詩齊魯韓源流未真異師說
毛公嶽嶽生河間大小二序自子夏孔門一綫天爲完

詩人美刺不易曉賴此猶可尋其端事久論定置博士
皎日旣出燭火寒康成作箋傳萬古縱有異論誰能干
何人載筆逞臆見聖經等作淫辭看我行武垣經故壘
秋花照地紅爛斑居人云公葬茲處遺址不見沙漫漫
或言金元積貴亂劇盜曾此相鈎盤壘名之起或以此
未必漢代理衣冠我聞此語大驚愕下馬審視空長歎
千年河朔用武國習俗勤悍人民頑報讐任俠競相尚
經術掃棄同榛菅卽今抔土姓氏在尚冀力挽頽風還
奈何憑空肆穿鑿使冒賊號增厥姦作詩爲告郡耆舊
時率子弟來游觀年年封殖慎勿壞一壘之重如邱山

過趙北口四首

融融波影映樓臺
夾岸疎花煖欲開
怪底深秋春似海
前年此地

翠華來

釣船多在板橋西
漠漠遙天入望底
垂柳萬株堤一道
綠陰分破碧玻璃

趙女如花鏡裏懸
黃塵吹盡水澄鮮
并刀應比吳刀快
翦得湘中一幅天

蘆花頭白蓼花酣
萬頃晴波倒蔚藍
寄語垂虹老桑子
燕南風景勝江南

癸卯

題吳上舍讀易圖

羲文世不作大易遂渺然堂堂魯宣尼十翼絕韋編秦
人烈火餘幸用卜筮全炳耀天地間祖述賴後賢商瞿
游聖門田何乃真傳吉凶雜災祥焦京母乃偏流傳至
東都折衷來鄭子王弼年少子妄共莊老詮唐初作正
義專主其說焉餘風被宇宙漢學如飛煙何來黃冠師
忽出先後天手畫太極圖佐之河洛篇諸儒尊於後濂
溪信於前遂以道家流加諸爻象先學者習其非於今
七百年吳君聖人徒獨抱遺經研陰陽玩消息健順參

坤乾示我讀易圖方寸百感煎放筆題數語狂疾不可
痊詩成出相質爲我砭愚顛

古意二首上翁覃溪師

小草生田間荆榛相蔽虧托根在賤地作花何足奇田
夫旣不顧采擷終無時敢望雨露及常恐耰耨施一朝
見君子謂是蘭蕙姿移置通都中殷勤灌溉之草木豈
忘情芳馨日以滋何時紉爲佩以報幽人知

威鳳丹山來萬里翔元圃雲霞麗五色文章照千古從
遊皆鸞鶴不與凡鳥伍巖下有山雞顧視矜毛羽欲附
鸞鶴飛含情不敢語自慚兩翼弱未足致高舉鳳如不

識察脈脈終自阻矯首望青雲朝朝鏡中舞

和作

大興翁方綱覃谿

據梧與枝策等是無成虧滑疑寓諸庸堅白何足奇
圉枿合比竹封畛非識時萬籟叩南郭五車漫惠施
匠氏爲占夢忽逢梁棟姿造物磊砢氣一笑偶共之
風露一會合礪谷交液滋夢中喻用語瞬睨焉得知
猗猗琅玕寶下照瑤瑤圃節足相應聲黍尺嗟曠古
奇律不易逢崑邱漫爲伍相感聽和平非關矧毛羽
天闔日五色綠樹春鸞語矢音母自輕矯翮試高舉
遵陸儀旣成中沚溯焉阻噬肯惠听夕飲食式歌舞

客有以萬壽寺僧七松圖索題者書此應之

空山夜聚龍蛟螭聽經競繞人天師寶錫一響衆山應
迷者遁走悟者化作枯松枝曉來趺坐手加膝數之其
數適得七或俯或立如行童齊受毗尼真戒律天風吹
松松有聲阿師心似琉璃明此身已幻畫更幻不妨借
畫開無生對面相看不相識默如雷霆語牆壁本來面
目知是誰舌上青蓮飛霹靂昨者有客示我此畫圖夜
夢蒼顏紺髮七丈夫正容肅我坐於上觀彼同拜金浮
屠覺後聞鐘心自喜悠然頓悟楞嚴旨向汝團蒲試叩
之可能千偈如翻水松乎松乎吾故人阿師日與松相

親他年祇樹林中再相見會看寸寸生龍鱗

宋漫堂中丞重雕宋本施注蘇詩乃邵青門所改
竄者原本殘蝕斷爛僅十之七中丞裝褫藏篋
自他山所見影寫本後世久不知有真鼎乾隆
癸巳翁覃溪師以十六金得之燕市舊題曰注
東坡先生詩款書吳興施氏吳郡顧氏有毛子
晉及宋中丞印始知世所行者非真也癸卯二
月出以見示命廷堪作詩題於後

大哉仙人今古無筆驅萬景如驅奴真宰上訴天已怒
况復著手箋其書六丁下攫雷電走鉤元扶輿歸烏有

猶存蠹簡落人間施顧姓名均不朽重開注本自漫堂
開鑪再鑄半段檣至今舉國傳魏冉不知更有咸陽王
吾師矯矯金閨哲八載衡文往南粵應是坡仙幻後身
重向南荒吐雄傑真本市上偶見之古色照眼青離離
失喜不惜典衣買摩挲珍重同鼎彝昨過蘇齋取示我
零落縹緲逃劫火鬼物守護失撝訶斫斷蛟龍碎金鎖
歸來輾轉夜不眠匣中寶劍光燭天終當生剖蠹魚腹
搜取殘文續舊編

癸卯二月洪素人比部出守順德覃溪師以所藏
成化七年順德守黎永明所館銅爵贈行兼送

校禮堂詩集

卷四

以詩屬廷堪和作

黎侯昔爲順德守趙人愛之如愛母修舉禮樂興庠序
明德馨香生瓊卣劫灰零落三百載一爵依然脫塵垢
老苔駁蝕土花生忽入玉堂揮翰手幾年什襲篋衍藏
未肯輕將示賓友西曹楚國校士回轡滿千人萬人口
股肱大郡需良吏一麾又繼黎侯後離筵不惜持贈之
古色稜稜照杯酒欸識猶存成化年座上羣公傳玩久
乃知微物因人重金玉區區非匹偶不然一器何足奇
直與循良同不朽朱幡曉發春明門冉冉旌旗照花柳
嘶風大道五馬驕父老歡迎羣吏走上下肅肅清風來

夜夜歛雲動星斗

程彝齋招同王石曜工部小集

在昔東原氏曾將漢學論二君能入室六藝得專門著述書盈笥諧談酒滿尊晴窗忘晝永重與溯淵源

聞洪素人太守訃二首

讞獄懸秦鏡衡文得楚材朱幡剛北指丹旆遽南來對酒情如昨題書忍更開遙知襄國路父老不勝哀
索米長安市曾分清俸錢我邀知己重人愛使君賢回首成千古分襟甫半年墓門何日拜灑淚望江天

校禮堂詩集

卷四

三

校禮堂詩集卷四

校禮堂詩集卷五

歎凌廷堪次仲

甲辰

甲辰二月至揚州金棕亭先生招飲兼贈二律卽

席次韻

一鞭初自薊門還
樵悴風塵客子顏
未傍螭頭瞻北闕
却騎驢背別西山
文章造命原如此
貧賤驅人亦等閒
慚愧先生曾說項
殷勤仍爲掃柴關

蘇門才士聚東南

謂覃溪師

上客慚居玳瑁簪
秋水伊人情

未遠春風歸路夢
猶酣受恩真覺微
時重得解須從悟

後參今日竹西重話與尊前又見月初三

誰莊圖爲葉詠亭丈作

以馬不若以非馬以指不若以非指物論區區那足齊
其分也成成也毀誰莊居士天爲徒半畝小築城東隅
亂峯當窗水周戶古栢溜雨蒼髯須披圖恍坐青山下
舉世誰爲達觀者所居不惜以誰名庇寒乃構千間厦
昔者齧缺窮王倪物所同是惡能知民畏濕寢惴木處
鱗以爲國援安之始知恢詭漆園吏卮言寓言均未至
太山本不敵秋豪妄將人我分爲二我亦飄蓬東海邊
買山終日羨歸田何時卜宅烏聊畔靜讀南華第二篇

夏日感興

綠陰深處亂蟬鳴望遠無端客思驚已悔暫爲齊贅壻
可堪常作魯諸生瑤琴此日彈應倦金線頻年壓未成
底事廣陵佳麗地照人惟有月多情

甲辰去揚州阮伯元賦詩見送作此答之

我年二十餘海上守寂寞朝夕研故書所得良足樂頗
怪唐後儒萬古太穿鑿千載訓詁傳棄之士苴若後學
相傳染其病不可藥說詩詆毛鄭講易尊河洛尚書古
文雜麟史三傳削至於古禮經居然置高閣但取小戴
記輟轉相附託譬之書大傳上將壁經搜高談性與命

校禮堂詩集卷五

此外皆可略求遠先舍近守約畏求博我見雖如此深
恐識未擴出門求友生所遇多落落持此語向人掩耳
輒走却今春來邗上飢寒守空橐眼底忽逢君不異雲
中鶴共語三日夜解衣肆盤礴力解庖丁牛斤去郢人
望新秋我北上與君乍離索君賦送我詩深情具盃酌
謂我他山石可效攻玉錯君才大如海秋風振鵬鷃一
舉翔萬仞塵世仰寥廓著述信可娛事功亦不惡他日
倘同登毋忘貧賤約

元作

儀徵阮元伯元

壯夫不讀書百年太寥落所患無師承辨逕多岐錯

指日乃扣槃問天或捫籥所聞皆布鼓所見亦火爇
淩子來揚州其學無垠塲時時出緒餘爲我啓扃鑰
書陳安國僞易斥輔嗣鑿與義尊荀虞贗圖黜河洛
讀史魏金進論統晉宋削更借叔然法和我舌與嚅
倚聲與顧曲亦至析微漠具識無差池持論少迂還
况以居相鄰往來盡脫畧案盤具疏食卷帙雜盃酌
篝燈談轉清風雨響簾幕何當說遠行忽忽意無著
昔賢拜責言孤陋咸雜索惟思雙鯉魚素心或可托
握手更贈言持爲此後約親老家復貧相將縻好爵

乙巳

乙巳二月初七日

皇上親臨辟雍講學禮成恭紀二十韻

七曜遵乾度三登肇太平
濺汪

恩溥被巍蕩

德難名斂福羣黎壽宜威四海清
萬年

皇極建二月辟雍成玉鬯頒

天府金錢發水衡直過殷右學不數漢東京
取象詩箋

璧徵文禮注明涵雲波影細映日浪紋輕
特

詔乘春令親臨率上卿六龍扶

寶輦雙鳳導霓旌博士橫經侍儒臣載筆迎
綠楊風乍

展紅杏雨初晴仙丈彤墀擁鑪香

御座紫祠官陳俎豆協律奏咸英經義紛綸出

王言辨析精說書標善至演易法天行重譯梯航接
盈階劍佩鳴駿奔周庶尹鵠立魯諸生

聖學高千古

皇仁徧八紘蕪辭同擊壤載拜矢丹誠

學古詩二十首

廷堪甫毀齒出就外傳受四子書粗識句讀而已少
長習商賈久之鈍如故乃學吟詠爲人傭書日月逝
矣而德不修也年屆三十闕市借人稍稍有所窺爲

學古詩二十章

論禮數章係三十
外作今併錄入

憶昔學語日出就童子師迫使讀大學百讀百不知及
長服商賈自廢身中時辛苦竟朝夕僕僕爭刀錐棄去
勤誦讀學爲古文辭奔走風塵間爲人作嫁衣頭顱漸
老大中心常苦悲偶爾探經術始覺從前非聖塗雖未
見望望懼背馳義理浩煙海千載以爲期

西京傳禮家二戴暨一慶各有專門學授受異塗徑學
官十七篇博士肅功令折衷今古文偉哉高密鄭別記
說禮言亦出德與聖不過章句餘雜引互相證詩外傳
韓嬰書大傳伏勝至今二傳存不與詩書並云何小戴

記乃較本經盛譬諸踈迹臣公然執國柄願言尊聖經
撥使反之正

民受天地中不能無偏陂聖人知其然制禮以節之其
精原性命其跡惟威儀吉凶賓軍嘉一一非矯爲優游
就矩則大道自可幾復禮聖所訓約禮賢所希不聞於
此外別詡神與奇後儒畏繁重翻謂不足治自遁於虛
寂穿鑿多支離舍禮而談理語錄空費辭

鄭氏注羣經易禮兼詩書擇言粹且精七緯均刪除其
書半在亡存者焉可誣周官非禮經載記亦漢儒紛紛
傳記家醇雜原分塗明其次於經始以圖讖俱末學等

視之不識經傳殊集矢向前哲出口成妄愚詆者固庸
謬辨者亦拘虛非所議而議撼樹徒區區

儒林序五經周官未立學班書藝文志僅附禮家畧蓋
禮之支流存以備探索猶之書春秋汲冢國語若月令
及王制秦漢所依託胡乃號三禮辨名誠大錯自從唐
以還二書爭述作屈指注釋家著錄滿囊橐古經鄭賈
外學者日荒落何當誘利祿庶可漸疏鑿

儒者不明禮六籍皆茫然於此苟有得自可通其全不
明祭祀制洛誥何以詮不明宮室制顧命何以傳不明
有司徹安知楚茨篇不明大射儀安能釋賓筵不明鹽

與薦易象孰究研不明聘與覲春秋孰貫穿如衣之有領如官之有聯稽古與有獲用志須精專

大易贊天地三聖遞闡揚田何接商瞿施孟非無名真源紹述微勞流起焦京縱茂寄生枝本根終難萌况復王輔嗣私智雜老莊貞觀主其說漢學遂以亡賴有資州李泰山拾豪芒宋人生苦晚去古益渺茫太極泊河洛蠡測空披猖十翼尼父言胡不細審詳

逾冠讀尚書始與四代親孜孜論今古區別僞與真名物及象數不暇勞心神堯典禹貢篇其學無涯津敷土奠九州凝績撫五辰持此或問難遜謝空逡遁因思古

儒者精博真難倫沿革考疆域推步窮秋春仰不辨躔
次俯不知廣輪冥然天地間何以名爲人

士生千載下臆度千載前於理縱有得於事終懵然詩
人通諷喻載之三百篇善善而惡惡各以事繫焉不有
大小序微婉何由宣漢說雖紛綸靡不承師傳柰何信
後儒舊故等飛煙棄置毛公傳招擊鄭氏箋古人不可
作吾寧守殘編

說詩主淫奔盡人知謬悠豈俟今之儒喋喋不肯休百
則論古音聲韻恣冥搜議論日益多實學日以浮不知
典與則隨處皆可求鹿鳴詠瑟笙燕禮非無由瓠葉飲

酒詩可考獻酢酬俎豆及燔炙器物密以周舍此不講習開卷張兩眸鄭氏精於禮故可垂千秋

春秋出漢初公羊始萌芽嚴顏二氏學各自稱專家雖有左與穀未立將柰何況敢舍傳文瞽說爭誼譁慨自鄭司農始操何氏戈延至啖趙後新義如亂麻人人論褒貶戶戶相譏訶詎意聖人經竟同法律科三傳置高閣玉川何太多誰能界炎火太息空咨嗟

聖沒微言絕道在七十子苗裔徧天下各各有撰紀西京彙羣言遂有戴氏禮醇疵固不掩均屬聖人旨博士漢代官不韋大賈耳片言苟足采乃與荀卿比豈似宋

儒生吹毛論百氏高談表大中低眉講性理專門訓詁
學屏棄付流水

道非文不載文非釋難通字體苟訛誤流傳惑愚蒙爾
雅及說文力能匡聖功古者八歲後卽使游其中自漢
逮汴宋猶未泯遺風淳熙變小學六書如枯蓬灑掃與
應對小子皆盲聾賴有漢碑碣尚足辨異同陋彼竈下
養但賞筆畫工

六書廢已久訓詁多闕殘一二篤信儒闡發誠艱難殷
殷考訂時亦擇心所安纖兒拾唾餘羣籍求不觀但取
許氏書閉戶施鉛丹六經所有字無不遭譏彈說文未

載者毅然信筆刪用力既不多已足驚愚頑尋彼沽譽
念真見其肺肝宋儒論錯簡厥咎尚可寬似此僭妄罪
何止如邱山豈其許叔重遂掩周孔還

周衰異學興大道危將墜嚴嚴子居氏抗論辨義利同
時有荀卿厥功亦匪細法言中說文卓絕差可繼儒術
一綫傳千秋罕異議孰意南渡來指摘無餘地性惡荀
況黜美新子雲棄至於文中子亦負僭經累嗚呼閩與
洛遂與洙泗配道統固云尊恐非聖人意

史有談天衍倡論頗荒怪冥心天地初幻想九州外焉
知釋氏言非卽此流派彈指見大千須彌縮一芥語言

校禮堂詩集

卷五

文字間觸處皆障礙自非中有主罔不被其害小智務
高遠轉謂吾道隘機鋒逞聰明儒宗妄參會坐使聖賢
旨彼此互茫昧寄語高明資慎勿混疆界

龍門論六家獨推道精妙旨趣雖無爲要亦輔政教神
仙方技流判然不同調何年合爲一借以極煇耀至今
黃冠師不與初祖肖服氣游太清飛空躡雲嶠寶籙驅
鬼神金丹養顏貌妄言姑妄聽未暇與之較倘使老聃
聞粲然亦大笑

史以載治亂學者資考究胡爲攀麟經師心失所守拘
拘論正統脫口卽紕繆拓拔起北方征誅翦羣寇干戈

定中夏豈曰無授受蕞爾江介人弑篡等禽獸荒淫無
一可反居魏之右金源有天下四海盡稽首世宗三十
年德共漢文懋南渡小朝廷北面表臣構柰何紀宋元
坐令大綱覆免園迂老生永被見聞固安得如椽筆一
洗賤儒陋

文章無成法達意卽爲善高源萬里來曲折隨地變百
家異趨向各明已所見胸腹苟無得辛苦枉段練文極
自生質時代遞相嬗齊梁誇俳優天章五色絢韓歐矯
其習遂爲不學便入主出則奴門戶競攻戰吾心別有
在經經守經傳

十五學吟詩於今十餘載雲霞工琢鏤山雞耀文采近
始覺其陋稍稍自悛悔昨來豁然悟是有道在誠能
具性情一往衆理解充學養以氣事半功乃倍宣德忠
孝盡紀俗輶軒採白首操管客推敲力疲殆斤斤辨唐
宋平地起江海書稱詩言志此後庶幾改

孔撝約檢討過訪深談竟日

翰林聲望重東州洙泗文章萬古流周髀遺經傳趙爽
公羊絕學繼何休眼分青白緣差等手染丹黃爲校讐
秋草不嫌深巷滿肯來尊酒話綢繆

牛師竹先生以余與令子次原胡大樹思讀書辛

苦招游萬泉寺晚歸設饌暢飲卽席成詩

北風獵獵搖窗燈對牀夜讀膚生稜不分貴介與措大
三人一例成凍蠅奇章丈人有深致曉戒園如促車騎
褐裘大呼來叩門約訪城南萬泉寺寒林有路曲曲通
老僧閉門芋火紅周堂野水凍欲裂仿佛人在玻璃中
歸來供具咄嗟辦紅燭當筵羅獸炭今朝何煖昨何寒
相顧所然一笑粲爲憐勞苦羅珍羞美酒不妨傾百歐
長安轉眼花如海何日慈恩並轡遊

丙午

送李載園明府之官保定同牛四次原作

李侯豪氣天下無十年遍讀琅函書一朝綰符作縣令
展布聊發胸中儲三十亭亭面如玉長安貴人爭刮目
平生珍重八斗才獨爲疎梅寄幽躅憶昔逢君花滿天
歌樓竝繫青連錢笑拂紫裘岸赤幘市人遙望疑神仙
名花一枝春一國我亦當筵醉吹笛別有娉婷吳苑春
等閒也露傾城色勝遊未已離緒生征車向曉辭春明
風流如君信不易作吏猶得依神京別離刺刺何須語
行見賢聲重畿輔袖中攜得薊門雲灑向花封作霖雨
銅章墨綬交輝光吏民嘖嘖稱循良但教人畏神明宰
不礙多情賦海棠

懷阮大伯元

千里關河一寸心
金臺歲月苦侵尋
美人何處暮雲合
行子未歸秋水深
落拓敢希方朔米
相思慵鼓伯牙琴
別來幾度燕城雨
誰與挑燈論古今

曉起望西山有感作

時學時文
已一載餘

東坡望廬山但識面目奇
身未入山中曲折何由知

哭章酌亭四十六韻

少小同里閨嬉戲若弟兄
尊以膠投漆中寸步不忍分
朝朝共器食夜夜聯牀眠
窮愁得密友亦復開心顏
聞聲我

君愛望影君我憐方嫌百歲短願訂他生緣已春我出
游留滯鑾江邊綢繆乍別離相思浩漫漫愁心類春草
莫可尋其端次年君取婦生兒嬌且妍中間隔數載懷
抱無由宣慰我尺素來語長意樸真時時夢見之如覩
天半雲未幾我挾書北入春明門君去我益遠兩地潛
酸辛年壯意氣盛謂富貴不難柔情不足惜小別不足
牽何期中道絕一旦成棄捐今年我下第秋風歸海壖
入門聞君耗痛哭傷我神譬如天邊鴻雙飛正聯翩矧
繳去其一慘絕安可論撫棺一長慟淚如江河翻君婦
抱遺孤述君臨終言君息如游絲輾轉床褥間與我一

永訣北望摧心肝傷哉情至語路人尚難聞况復君與
我共命同一身君貌皙而頤纖妍如美人君詩清而腴
澹施如遠山君情深而長蘊藉如佩蓀收淚憶往事惘
恍驚神魂初疑傳者訛又若夢寐然凝視一斷絕雨涕
重沱瀾再拜奠生芻君前聽我陳生死雖異路情誼終
相連君子卽我子不必縈九原莫憂形貌殊但令精誠
堅浮屠如可信再結未了因生生長傍依世世加愛恩
金有時而泐石有時而剝陵有時而易谷有時而遷火
有時而寒泉有時而溫惟我與君情萬古常纏綿

丁未

小孤山

碧樹紅樓映玉顏
客帆初過小孤山
前峯雲重黛眉淺
明月滿江聞佩環

南昌使署聞翁二宜泉館選之信用林丈韻呈覃

溪師

鸞鵲天書向曉過
仙郎文思邁長河
蘇門詩格斜川好
劉氏經傳奉世多
侍直同看花影麗
退朝應羨佩聲和
他日伯仲聯翩上
會見壩簾一處歌

大梁上畢大中丞四十韻

作粥邦屏翰惟良

帝股肱掌書周內史持節漢中丞若木卿雲麗扶桑旭
日升宮花園紫綬官餅宴紅綾天祿無雙選慈恩第一
層鳴珂趨瑣闥珥筆侍觚稜特簡

宸心契分猷

寵命膺九峴方蒞止三輔盡歡騰婦子傳熙皞人文慶
蔚蒸溫如含璞玉潔比在壺冰昔者萑苻發紛然羽檄
仍指揮謀自靜守禦勢堪乘帳下沾醪醴行間挾纈繒
叛蕃潛穴鼠戰士脫鞬鷹隴坂軍威壯秦關喜氣凝奏
功孚

黼座移鎮過峭陵豪右清兼併窮黎給斗升煙含菽麥

隴雨細稻花塍布帛家家足倉箱戶戶登河淮同灝瀚
嵩室竝峻嶒瓠子流如帶桃花浪不興鈴轅虛請謁幕
府盛賓朋民被恩無轂人欽行有恒政聲元夙仰學術
更宜稱器與山俱重心隨水共澄儒林齊鄭服文苑壓
歐曾四海尊山斗諸生負笈簪簪疏經河北賈注史汝南
應訓詁今多誤聲音古可憑百家資考證六籍表師承
象緯殫心考輿圖悉力徵長編刪李燾事畧續王偁鉅
製千年貫雄辭萬手謄是非分黑白得失判淄澠大雅
誠誰竝鯁生敢自矜晨昏瞻白髮風雨愧青燈何幸親
顏色從茲得準繩叩鐘人寡學殫缺客何能俛俯情無

極低回感不勝慚非鴻鵠翼願附九霄鵬

校禮堂詩集卷五